

拜經樓藏書題跋記

拜經樓藏書題跋記卷四

海昌吳壽暘虞臣纂

纂圖互注老子

宋本纂圖互注老子二卷卷首序題太極左仙公葛元造每葉二十四行每行大字二十小字二十三有方纂時鳴私印方而怡際明父圖記

真經道德指歸注

真經道德指歸十三卷題蜀郡嚴遵字君平撰谷神子注卷首爲總序並元德纂疏先君子跋見愚谷文存

又別錄

四庫全書提要簡明目錄渭南文集郡齋讀書志衛本蜀本讀書敏求記各條爲一冊四庫提要

目錄云曹學佺作元羽外編序稱近刻嚴君平道德指歸論乃吳中所僞作今案通考晁氏之言

案此條通考所引與今本

讀書志不同

先君子書云通考所引讀書志乃衛本世行

板本乃蜀本故互異也又谷神子注本晁氏尙著錄十三卷不云佚闕此本載谷神子序乃云陳隋之間已逸其半今所存者止論德篇因獵其譌舛定爲六卷與晁氏所錄亦顯相背觸且旣云佚其上經何以說目一篇獨存至於所引莊子今本無者十六七不應遵之云云先君子又書云按六卷本指歸論前列谷神子序者安知非明末人從十三卷中鈔此序以冠卷首晁氏所云十三卷谷神注今道藏尙有之原未嘗佚闕所稱莊

子曰卽君平以旣諱嚴卽稱莊子誤認爲子甫殊費詞矣

晏子春秋

元刻本晏子春秋八卷篇目內如首章莊公矜勇力不顧行義晏子諫第一後同明時本作諫矜勇力不顧行義不書全題又篇內按語俱作大字加圓圍以別之明時本則作小字分注于下與此迥然不同矣惜首闕半頁有書帶艸堂疑冬書屋馬叔靜圖書記諸印紙墨俱古抱經堂羣書拾補云劉向敘錄云定著八篇二百一十五章予所見者明吳勉學本止七篇二百三章今陽湖孫氏星衍得沈啓南吳懷保本校梓者分八篇多十

二章與敘錄之數適合今此本篇章亦同學士曾借校並補刻全目於後書云余校晏子將竣吳槎客示余元人刻本其每卷首有總目又各標於當篇今本皆缺目錄以此補之

又

明鈔本晏子春秋作四卷卷三後書萬厯十六年冬吳懷保梓卷一後書崇禎十三年庚辰閏四月初六日校錄於雪履齋仁和鄭紹孔伯翼甫識蓋卽從吳刻本傳錄者末附柳宗元辨晏子春秋一篇史記管晏列傳及孔叢子六條按文獻通考引崇文總目晏子春秋十二卷晏嬰撰原釋晏子八篇今亡此書後人采嬰行事爲

之以爲嬰撰則非也

錢侗按玉海引崇文總目同舊唐志七卷今本八卷書錄

解題晏子春秋十二卷齊大夫平仲晏嬰撰漢志八篇但曰晏子隋唐七卷始號晏子春秋今卷數不同未知果本書否蓋晏子八卷早佚後人采嬰行事爲之加以春秋之名其作八卷者猶仍漢志之舊此併爲四卷且篇目不載全文視前舊刻本漸失古意矣惟崇文總目書錄解題俱十二卷而四庫書目及余家舊刻作八卷疑又經後人併合以符漢志八篇之數也

曾子

元本曾子二卷內外篇凡十四每卷題傳道四子書曾子卷第次有達左序每篇末引宋諸儒說及達左按語

自大戴禮中錄出者凡十篇有楊簡注他若汪暉趙汝騰劉清之章樵宋鳴梧曾承業戴良所編分見於儲藏家著錄蓋此書原本早佚諸家各據當時所傳之本互有編輯卷第分併亦各不同耳

荀子

元本纂圖互注荀子二十卷每葉二十二行每行大字二十一小字二十五序目不全盧學士校刻荀子曾借其讐校學士舊刻敘此書云元刻纂圖互注本此乃當時坊閒所梓脫誤差舛不一而足然正以未經校改之故其本真翻未盡失書中頗多采用

呂氏春秋

呂覽二十六卷元刻本卷首有遂昌鄭元祐序序後有
嘉興路儒學教授陳泰至正十

下缺

吳興謝盛之刊一

行每葉二十行每行大小字俱二十有南書房史官海
甯查慎行字夏重又曰悔餘得樹樓藏書諸圖記蓋曾
爲初白先生收藏序首缺半頁先生手書補全 先君
子識簽云此元初刻本序文前半頁乃查初白先生手
筆鈔補真如白獺髓矣兔床志 前副頁附松蘿先生

手札云呂覽卷二十一慎行論中有緩氣之說不獨元
板明板亦不刪已檢得矣籠口之說大約在淮南子注
中弟處淮南子乃明刻本有批點者注極略鄴架所儲
或係別本望便中查示再呂覽匆匆閱過但縱目力所

至恐尙脫漏並乞留神再檢爲感

太元經

宋本太元經十卷後附王涯說元五篇太元經釋文一卷萬玉堂刊本有右迪功郎充兩浙東路提舉茶鹽司幹辦公事張實校勘一行每葉十六行每行大小字俱十七中多缺筆避諱之處有子孫保之太師趙氏世德堂印長川吳氏諸圖記盧學士借校原缺三卷學士影鈔補全摘錄陸績述元數行于首頁並記云又有說元五篇唐宰相王涯字廣津纂又有太元經釋文一卷注云此本自侯芭虞翻宋衷陸績互相增損傳行於世非後人之所作也按是書紙色甚舊每卷署晉范望字叔

明解贊卷末有云楊氏本自元首已下至元告凡十一篇並是宋衷解詁陸績釋文共爲一注范望采二君之業折衷長短或加新意就成此注仍將元首一篇加經贊之上元測一篇附逐贊之末餘自元衡以下至元告九篇列爲四卷三家義訓互有得失以待賢者詳而正焉 卷三後先君子書云嘗收得萬玉堂舊刻太元經紙墨頗佳前葉印記累累蓋橫塘吳氏曾藏之惜前闕三卷無從物色餘姚盧紹弓學士續補方言時嘗借觀之亦惜其不全閱數年學士掌教晉陽偶借得全本因憶及予家缺卷亟令楷書手爲補錄三卷從數千里外寄余俾成完書其好古懷友之心均非近人中所有也

爰識于此俾後人知是書獲全之始末云乾隆癸卯夏仲兔床吳某

賈子新書

右新書十卷明正德九年陸良弼刊本有黃寶序先君子以欽遠猷校本過錄於上每卷首題新雕賈誼新書下題梁太傅賈誼撰目錄後有建寧府陳八郎書鋪印一行前有袁氏宋本校過一行並補審取舍篇於過秦目下係以何孟春跋語及己亥三月遠猷題記又卷末書云賈子世無善本互有訛缺今集彬陽何氏本長沙本武陵新本及此本參相去取得正其十之四五不可攷者仍闕以俟別本更訂己亥三月十有二日燈下遠

猶書按遠猷卽欽遠猷抱經堂盧氏本所稱李空同本
正德八年刻後有欽遠猷者不知何時人是也又謂何
氏於文義不順者頗加竄改又於過秦論後補審取舍
一篇乃錄大戴禮察篇全文今不用其宋本當卽盧氏
所謂建本明毛斧季吳元恭皆據以改近世之本者是
也以有建寧府陳八郎一行故稱建本云

又

右盧氏抱經堂本先君子以明刻大字本校至二卷止
記前云乙巳夏五有書賈持明刻賈子一部欲售於予
先爲汪氏映月軒所得因借閱之其字視今時本頗大
前有黃寶序已不全似卽所謂陸良弼在長沙所刻本

是日手校二卷屬有事未竟他日當再借以卒業也槎客記又書卷末云抱經學士校刻此書具費苦心可謂有功於長沙者某嘗觀明何燕泉餘冬序錄中述賈誼新書數條語甚詳燕泉并有校定重刻本書此以俟他日更訪求之辛未人日兔牀又志

風俗通

風俗通義十卷前有劭自序元大德丁未大中大夫行都水監李果序後有宋嘉定十三年東徐丁黼跋卷首題大德新校正風俗通義每葉二十行行十六字卽抱經堂羣書拾補所稱大德本者是也拾補載李跋作李晦與此異尙有謝居仁跋此本無之而有嘉定十三年

丁黼跋知此本從宋本出也按謝序予觀風西浙至無錫有耆儒李顯翁晦來訪云云據此李字顯翁則當名晦此本作果疑誤

王西莊光祿所藏大德本亦作李果

說苑

說苑二十卷宋刻本每葉十八行行十八字卷末題咸淳乙丑九月鄉貢進士直學胡達之眎役迪功郎改差充鎮江府府學教授徐沂迪功郎特差充鎮江府府學教授李士龍命工一條 仁和孫頤谷侍御跋云海昌吳兔牀先生以宋本說苑見示乃咸淳乙丑所刻予取以校叢書程氏榮刻本其立節篇云比干殺身以成其忠尾生殺身以成其信伯夷叔齊殺身以成其廉程本

脫尾生句則與下文舉忠舉信舉廉之語不應又復恩篇遼伯玉得罪於衛君一則程本所無此舊刻之可寶然予尙有疑者晁氏郡齋讀書志敘說苑篇目避宋孝宗諱易敬慎爲法誠而此本不易且李善文選注及太平御覽諸書所引說苑間出今二十五篇之外王厚齋南宋人也撰困學紀聞引晉靈公造九層臺荀息上書求見云云此本亦無之則是書之闕佚者多矣校勘旣竣因還其書而錄所疑於後甲辰二月仁和孫志祖跋吳門黃堯圃主事跋云此咸淳乙丑九月重刊本說苑拜經樓藏書也余友海甯陳君仲魚知余新得宋刻廿二行廿字本校諸本爲勝因取是本相示余校讀一

過與向所見顧抱沖本相同而字之正誤彼此互異當
是版有原與修之別印有初與後之殊也其妙處卷四
立節篇有尾生殺身以成其信一句卷六復恩篇多木
門子高一條自明天順本以下皆無之則信稱善本矣
惟是卷六陽貨得罪條多非桃李也四字余本爲然與
紹弓盧學士羣書拾補引御覽合此猶失之其他與余
本異者亦復彼善於此此真宋本之乙邪內闕第十四
卷向未標出惟抱沖本亦闕八至十三卷此本可補惜
抱沖已作古人拜經又居他邑彼此鈔補爲難耳丁卯
小春望日讀畢復翁黃丕烈 是本紙墨古雅每卷末
有黃縉亭藏書圖記第十四卷從別本鈔補 先君子

書孫跋後云甲辰春偕丁小正學博過頤谷侍御齋子以宋版說苑眎侍御旋爲予作跋屈指今十載矣癸丑夏展閱此書并錄其跋于卷後因識又云此書爲吾鄉陳茂才以岡舊藏予用善價購得兒壽照甚愛之丁未春計偕入都攜之行篋州車往返未嘗暫離不意旋染目眚廢書者四五年展閱此書慨焉寤歎

帝範

右四卷知不足齋叢書校刻本綠飲先生記面頁云第三次校修先君子又爲覆勘書後云戊戌冬夜橫河舟次用吳郡黃省曾嘉靖己丑刊本讐勘凡拈出八十一餘處

近思錄續錄

近思正續錄二十三卷宋刻本每葉二十六行每行大字二十四小字二十五六字不等紙墨精雅有東谷武原鄭氏圖記蓋端簡舊藏彌足珍重

太平廣記

右明刻本口十口卷簡莊先生依宋本手校先子跋云此明刻本太平廣記爲譚愷開雕較世行坊刻猶有古意卷首有郁逢慶叔遇圖記按叔遇嘉興人性喜收藏書畫崇禎中嘗手輯古今名人法書名畫題跋記正續各十二卷可與汪氏珊瑚網孫氏庚子銷夏記相頡頏惜未有爲刊行者此書閒有關番皆郁氏原補而陳仲

魚孝廉復依宋板爲予手校一過尤可爲插架之良本矣嘉慶癸酉立春日八十一叟吳某志于西籒

纂圖互注文中子

宋本纂圖互注文中子十卷前有文中子纂事世系年表一篇題河汾肆子王壬無目錄有阮逸序末卷數篇後爲杜淹文中子世家錄唐太宗與房魏論禮樂事關子明事書錄解題云唐志五卷今本第十卷舊傳以此爲前後序王福時王氏家書雜錄等此本與前纂圖互注老子同紙墨俱佳有海昌馬思贊印中安一號漁邨圖記

鑑誠錄

鑑誠錄十卷影宋鈔本 先君子書後云右鑒誠錄十卷後蜀東海何光遠輝夫所撰晁氏讀書後志謂其在唐證中纂輯唐證未詳其義觀所紀多唐末五季及西蜀時事昔朱竹垞檢討嘗得宋槧本乃項氏天籟閣舊藏首闕劉曦度序此本從金閶宗人伊仲借錄蓋影宋鈔也劉序亦無間多闕文聞桐鄉金雲莊比部新購得宋刻本亦有闕文未知與此本同否當更借校之乾隆丙午閏七月十五日免牀吳某識

文心雕龍

胡夏客曰隱秀篇書脫四百餘字余家藏宋本獨完丁丑冬復得崑山張誕嘉氏雅芭緘寄家藏鈔本爲校定

數字以貽之朋好夏客字宣子海鹽人孝轅先生子也
然據所錄補四百餘言尙不無魯魚爰復爲校訂錄於
簡端槎客吳某記

澠水燕談錄

右十卷明商氏稗海刻本綠飲先生於乾隆甲辰嘉慶
壬戌兩次從宋本校均識歲月于後丹黃排比幾徧并
於卷首補錄紹聖二年自序 先君子書云稗海中所
刻書多芟節譌謬而澠水燕談錄其尤也往嘗見吾友
鮑綠飲有宋本最善未及借校時往來於心頃綠飲特
爲予取是本而手校數過遂成善本後人其珍之倘有
好事者依此重刻則更藝林一快事矣癸亥三月兔床

吳某志時年七十又一 原本忠孝才識爲四卷依宋
本卷五高逸一門仍是第四卷以下遂遞差一卷 先
君子記後云前原序自云十卷今據綠飲所校則止有
九卷豈此下尙少一卷乎當更叩之參軍耳

雲麓漫鈔

雲麓漫鈔十五卷 先君子從知不足齋借本傳錄手
自校正用硃筆並屬朱巢飲先師校用錄筆 十卷後
有綠飲先生跋云雲麓漫鈔刻於商氏稗海者祇四卷
此本傳自趙氏小山堂較商氏所刻已多過半而宋詩
紀事及南宋雜事詩所引李易安投翰林學士綦崇禮
書不在焉然則此尙非全書耶更當覓善本訂正之乾

隆壬午端午後一日知不足齋識又云曹彬侯跋清波雜志云雲麓漫鈔二十卷則此亦僅有其半耳丙戌五月廿有九日蘆渚寓舍書又書十五卷末云乙未十二月十二日得十一卷至十五卷于小山堂李清照啓載十四卷中觀自序則此書祇十五卷曹所云二十卷者恐未足據耳先君子書後云庚子夏日從綠飲借得雲麓漫鈔十五卷因爲傳錄并倩朱君允達校而藏之拜經樓按此書書錄解題亦作二十卷又續鈔二卷乃中庸說及漢定安公補記然藏書家率未聞有豈不傳耶侯續訪之吳某簡莊徵君從予家借錄跋云嘉慶十一年夏日從拜經樓借得是本攜至吳中今年春始

得倩人傳錄甫竟遂手錄綠飲前後三跋并拜經樓主
人所跋所評細校一過至吾師朱子則稱師云以別之
適綠飲扁舟過吳見訪相與把玩爲之一快且謂余曰
此書尙缺圖數頁故未刻入知不足齋叢書綠飲年八
十矣尙健飯行不扶杖時攜書卷往來杭湖嘉蘇數郡
閒其好古清興正復不異昔日也嘉慶十二年四月望
日郭海陳鱣記

容齋五筆

右影鈔舊本原有硃筆評校 先君子復借知不足齋
所藏義門先生評校本過錄書後云乾隆辛丑春日偕
鮑君以文遊武原有書估謁予舟次攜鈔本容齋五筆

求售有硃筆評校蓋陳宋齋先生筆也因酬以直得之
復從鮑君借所藏何義門先生評校本用藍筆點次鮑
本末復有筠溪煦跋不具錄壬寅冬日兔床吳某識

義門跋云前四筆皆十六卷而此止于十卷蓋未成而
公已□□□□之已五年今始粗閱一過予之廢學亦
可見矣去年□□□□書頗多咸以爲非計不知都下
借書至不易得也冬閒□□□□滯大定精舍鄉人以會
試至者謂予曰所攜書亦曾看過□□否予愧謝之然
能於半歲中閱三四千卷雖古人或難之鄉人殆不識
甘苦之語以警予之情則可耳又五月二十一日沂州
奈園書塾書屺瞻康熙乙未十二月重閱□□中至正

月三日而畢去甲戌客臨沂時已二十餘年矣予精神日已向衰讀書所向抵滯聰明非復當□□□之留示餘兒少小當早自鞭策也

默記

默記一冊巢飲先師手寫本 先君子校並錄朱朗齋鮑綠飲二先生校文于上記簡端云朱鮑校俱用硃筆免牀校先用紫筆繼用綠筆 後有葉石君跋謂湖賈攜舊鈔本至先爲林宗取去林宗本尙有五總志 鮑跋云五總志南宋吳迥所撰世多未見予近始得之因自歎耽書之癖不減昔人所恨林宗石君輩不見我耳乾隆甲午秋日廷博 朱跋云甲午九月廿五日鮑綠

飲以此本屬爲校勘因合汪氏飛鴻堂汪氏振綺堂藏
本互勘三本皆善矣朱文藻 又鮑跋云朱君映潛校
訖見還予取飛鴻堂本重勘復是正數十處然飛鴻堂
藏本不佳尙有譌脫無從改定亦一恨也九月二十七
日燈下記 先君子跋云明日海昌吳某復從知不足
齋主人借觀據其所見筆之簡端又不下數十處而此
外譌舛者亦尙有數處終未能釋然此昔人所以有風
庭掃葉之歎歟又跋云癸巳歲予借得以文本吾友朱
君雲達爲予手鈔且以意改其亥豕藏之篋衍今予又
得朱鮑二君從汪氏二本校過者凡此一書合四家藏
本經四人手眼吾輩之好書可謂勤矣他日以示雲達

當更爲之忻然也甲午十月二十七日橫河舟次免牀
再志 簡莊徵君從予家借鈔書後云丙申七月二十
七日余從拜經樓借閱因亟命胡生鳳苞鈔之至八月
二十七日鈔畢其諸家校本仍照各色書之更有一二
改正處則用黃筆合觀之恍似文通夢中五色筆矣鱣
識吾鄉有王性之廟不知卽撰默記者否俟攷卷後有
葉石君跋按石君名萬吳之東洞庭山人晚家琴川聚
書數萬卷多手校過余每思其人近日修地志者不載
其姓氏殊恨事也所云五總志當更從綠飲處借鈔仲
魚載筆

吳禮部別集

右鈔本一冊 先君子從知不足齋借錄書後云乾隆丁未秋仲從鮑君以文借鈔按卷首題卷一而尾書卷下終書則止一卷且書中有云詳下卷而未見者疑尙有關佚當面質鮑子某記

塵史

鈔本塵史三卷 先君子手校本按抱經堂文集書後云記其本朝君臣事跡頗可以資攷鏡彥輔初受學于鄭介夫又嘗執經於胡翼之其師友多賢者故此書在宋人說部中爲最醇又謂假得虞山毛黼季校本自言得三本參校而以何元朗所藏爲最善此書舊有作四卷者雖篇葉稍均然非其本來也故今所鈔仍依三卷

之舊云此本亦三卷未知視元朗本何如當更訪之

羅氏識遺

舊鈔本羅子蒼識遺十卷後有隆慶三年姑蘇吳岫跋
簡莊徵君從先君子借校書後云嘉慶十五年十二
月既望從拜經樓借得是本攜至吳門以五硯樓袁氏
鈔本校勘一過補正良多彼本亦誤者未敢擅改俟得
善本再校也勃海陳鱣記於石泉古舍

離騷艸木疏

右舊鈔本四卷後有仁傑自跋及方粲跋末列張師尹
杜醕吳世傑校正銜名

紺珠集

右鈔本十三卷龔氏玉璫瓏閣舊藏有田居校及江聲
借閱題記 周耕厓先生曾從 先君子借校跋云歲

甲辰客都門分校續寫四庫書中有紺珠集十三卷原
本字句錯誤不可讀爲校正二千餘字重寫送館另錄
爲四冊藏之王疎雨時爲吉士見而借鈔其前三冊已
歸會其改刑曹後一冊久未鈔竟丁未秋將南旋屢趣
未得念是書流傳甚少不欲令棄前功而行篋所有非
足本攜歸亦無用乃以前三冊併付之其郎慶嵩嘗從
予遊屬鈔訖寄還閱今八載杳不通問每一念及未嘗
不悵悵也去夏兔床七兄出此見示欣然如遇故人前
有橫河龔氏玉璫瓏閣珍藏圖記又有龔稼邨秘笈之

印校者爲田居爲江聲免牀云稼邨田居皆錢塘龔蘅

圃先生

麟翔

自號玉璫瓏本宋花石綱故物今尙在橫河

姚氏宅江聲則金觀察

志章

別字蘅圃友也其本亦不免

訛字然視原本則善矣其異者彼前題朱勝非譔而此
無明文又多天順間賀榮二後序耳假歸踰年事冗今
始竟讀一過其書汰繁摘要便於檢閱衰拙善忘正苦
無記事珠回憶旅牕矻矻樂此不疲自度已不能復爾
而手校之本遂乃無可追索惜哉乾隆六十年乙卯七
月十八日耕厓周廣業書

墨志

宣城麻三衡著金壽門先生手寫本內載元時造墨宜

興潘材仲 先君子書云某按元時宜興多造墨名手
若吳國良吳善李文遠陶得和湯生不知其名並見倪
高士集中贈詩甚多然則此書所遺漏者不少矣墨志一卷
明季宣城麻氏孟璫撰凡分九類徵引賅詳論說古雋
似兼李氏墨譜陸氏墨史之長考孟璫名著復社屯脚
姑山兵潰被執死甚烈蓋節義之士其緒餘故自足傳
所作韻語已畧載竹垞明詩綜而墨志未見諸家著錄
近惟知不足齋所刊墨史中偶一附注亦希世之書也
此舊鈔本傳自冬心先生魚豕甚多先祖亦嘗校閱未
及細勘今春因蔣茂才生沐欲刊入叢書復悉心參校
一過尙虞疎謬俟明眼者再審之道光戊戌孟夏之月
清謹

疑獄集

疑獄集三卷前二卷和凝編後一卷子嶢續首有嶢序
及杜震序此鈔本乃吳氏太初所錄有其圖記太初書

後云此冊乃余友鮑以文得於石倉吳氏前頁有朱檢
討手書竹垞鈔本康熙戊子閏月奉寄池北書庫蓋錄
以寄漁洋山人者也按歸田錄載魯公與馮相道在中
書省問韓直訴責小吏良久及馮相語明哄堂大笑其
素性褊急可知而用刑一節能采古人精察得情者爲
疑獄集以當韋弦之佩亦可謂好學深思者矣子顯仁
中允繼父志彙成百條勒四軸今存六十六條分上中
下三卷蓋佚去四分之一云辛巳小春月太初吳長元
書於留耕艸堂

三器圖義

右錄說郛本 先君子手校

岳陽風土記

右一卷明許嶽重刻本有淳熙六年劉谷豎跋明嘉靖甲辰陸瑯徐學謨二後序

誠齋詩話

右舊鈔本一卷曹氏古林書屋藏本有櫟李曹氏藏書印曹溶二圖記

萬柳溪邊舊話

元尤玘君玉撰舊鈔本末有曾孫實七世孫晉二題跋

百寶總珍集

右舊鈔本十卷不著撰人名氏

宣德彝器譜

右三卷宣德三年呂棠奉勅編次舊鈔本

法界標旨乾坤體義

二種合爲一冊釋智貴輯廣漆校梓明萬厯間余永寧重刻而序之書各三卷

勾股矩測解原

右二卷姚江黃百家原名主一所著卷首有沈廷芳印

椒園二圖記

茶經

茶經三卷簡莊先生鈔本校正見遺 先君子書籤云

善本簡莊贈原本作卷上卷中卷下此作卷之一二三

每卷前有總目

珩璜新論

珩璜新論一卷 先君子從畢氏鈔本補錄七條書後
云乾隆乙巳殘冬有書賈攜散浦畢氏舊鈔本珩璜新
論來書分四卷末後多數條因命史補錄按晁氏讀書
志載孔氏雜說一卷或云卽此書果爾則一卷者乃舊
本也 簡莊徵君復以所得本互勘書後云孔平仲所
著談苑說部中多有刻者珩璜新論流傳絕少近從南
匯吳稷堂座師處得一舊鈔本中有竹垞圖記凡遇宋
朝故事俱空一格知出自宋刻其書亦作一卷不分爲
四但前有缺葉後亦少數條又多誤字因從拜經樓借
得是本補鈔所缺復互校一過是本舛錯亦多甚有脫

落數行者可見傳寫之書非經校讐猶之蕪田不治也
校畢遂題其後而歸之嘉慶十八年二月旣望陳鱣書

蘆浦筆記

蘆浦筆記口卷鈔本爲同邑林善長先生所藏有其手
校及按語親筆又有漁洋山人借觀一行評語三條末
有昌詩後跋及龔蘅圃侍御田居跋謂此帙借鈔于黃
俞邵家者與郁氏東獻軒藏本當無大異惟少按語一
條而多昌詩後跋及龔跋耳 先君子審定復經簡莊
徵君借鮑氏知不足齋本校今歲重陽徵君又於吳中
黃堯圃主事處見所藏舊鈔合校家枚庵先生手鈔本
內第五卷趙清獻充御試官日記多三月三日四月五

日事第八卷立起行五爲趙立起行伍又卷四已邱條
下多以鄉得名今撫州崇仁九字爲向來諸前輩所未
及者並詳蕘圃主事跋語中其餘字句之同異更難枚
舉徵君得之以校知不足齋新刊本歸而見示聆受之
下獲益宏多因照錄于是本是本字句行款多與黃本
同者然脫誤尙所不免得此校補洵稱完善矣惟綠飲
先生甫歸道山不獲補刊當屬嗣君清溪上舍附刻校
勘各條于後以竟先生之志而先君子手澤所存未
及以是相質證敬展遺編悲慟正無已爾

霏雪錄

右鈔本二冊無序目不分卷後有胡謐張文昭二跋

先君子題辭見愚谷文存此復錄明史本傳于前記云
余既手校霏雪錄復從萬季野先生明史列傳稿見鐫
續傳亟錄于卷首續字世熙別本皆作孟熙唐鑑毛蔡
亦見浙江通志毛鉉傳壬申十月望槎客又志是本爲
綠飲先生所貽有世守陳編之家老屋三間賜書萬卷
歛西長塘鮑氏知不足齋藏書印三圖記

棗林外索

舊鈔本棗林外索三集不分卷每集有目錄談孺木先
生著首有甲午秋七月自序

董令升遺事

附歸廬陵日記

右鈔本令升遺事首李心傳繫年要錄宋史禮志二篇

後列書錄解題弁所著各種一條 先君子記云弁所著又有嚴陵集九卷天一閣藏本見全書總目第一百八十七卷又直齋書錄解題有侍兒小名錄一卷續一卷序題朋溪居士而不著名氏始洪炎玉父集爲此書王銍性之溫豫彥幾續補今又因三家而增益之或云董彥遠家子弟爲之某按彥遠爲道之字則此二卷亦弁所著無疑今此書未見有專行本惟明商濬刻稗海中有侍兒小名錄拾遺一卷題宋晉陽張邦幾撰但陳氏又曰且爲分類其中多用古字今稗海本不分類亦不見有古字以經後人竄削非復令升之舊矣 卷末附朱翌和令升詩跋云某按董令升集空傳故原唱不

可見右數首從灞山集錄附此殆令升守新定時唱和之作蓋長孺紹興中嘗僑居桐江也令升又嘗有淵明先生集跋惜未見 此冊後又附鈔周益公歸廬陵日記起隆興癸未三月甲辰止是年六月壬申 先君子記云全集第一百六十五卷摘錄宜興事

日知錄

亭林先生日知錄初本八卷後附譎觚十事符山堂刻先生書前云愚自少讀書有所得輒記之其有不合時復改定或古人先我而有者則遂削之積三十餘年乃成一編取子夏之言名曰日知錄以正後之君子又自序上章闡茂之歲刻此八卷歷今六七年老而益進始

手抄本藏書見目錄
悔向日學之不博見之不足其中疏漏往往而有而其
書已行於世不可掩漸次增改得二十餘卷欲更刻之
而猶未敢自以爲定先以舊本質之同志云云 先君
子書第八卷九州條下云某按此二則今刻全本目知
錄中不載殆因閻百詩有駁正之語故亭林遂削去之
耶詳見潛邱劄記

又

右潘稼堂先生刻三十二卷 先君子以初本校並有
按語又錄閻潛邱補正及同邑許仲韋先生評語于上
又舊鈔本

右鈔本三十二卷先君以校刻本頗多增益書後云丙

午秋日得此書以志熹簡莊徵君借校記云戊辰夏自吳門至虞山較閱一過

菰中隨筆

右鈔本三卷 先君子校閱有按語復經胡雒君陳簡莊二徵君借閱雒君先生有粘簽數十條後附詩律蒙告數葉先君書云自稱詩律蒙告一卷而此只寥寥數條恐非全本

潛邨劄記

鈔本潛邨劄記七卷後附日知錄補正一卷 先君子評閱跋云亭林先生于上章閩茂歲先刻日知錄八卷板藏符山堂後附譎觚十事者也晚年更自序之以爲

中往往多疏漏且書已行于世不可掩漸次增改得二
十餘卷欲更刻之而未敢自以爲定云云今世所行日
知錄三十二卷乃潘稼堂太史手定而付梓者然視未
刻時原本已不無異同矣潛邛所見者猶是初刻本所
補正已如此使見全本其舉正又當何如耶吳某記又
云潛邛之學大約欲與玉峰抗衡而經濟終不及淵博
亦遜之錢塘馮山公嘗有潛邛劄記舉正若干條見解
春集壬子春又記

考正朱子晚年定論

右二卷孫退谷先生著有其自序此鈔本錢綠窗處士
書後云退谷著書甚富以考正晚年定論爲第一顧當

時雖曾鏤版而流傳頗少遠近積書家罕有藏弄者友人吳君子安偶於舊書中檢得一日語次及之遂假以歸亟讀一過見其考訂精確陽明復生不能不服夫退谷本以該博稱而能留心正學息邪距詖若此殊不若邇來博綜家沾沾於無用之辨不急之察語及程朱輒笑爲腐且陋也手錄一本藏之笥篋謀重鋟梓以廣其傳卷末所載羅公書殘缺不全爲考整菴遺集補完焉綠窗錢馥書

西崑發微

右舊鈔本三卷吳旻著首有自序及朱鶴齡序後復自係跋語

榕城詩話

右三卷 國朝杭世駿著有汪沅及杭自序全祖望長歌 先君子校並有案語

東城雜記

右二卷 國朝厲鶚著有杭世駿及厲自序 先君子手校記簡端云東城雜記二卷從知不足齋借鈔綠飲言此尙非足本惟郁陞宣茂才東齋軒藏本最佳當更求勘之甲辰秋七月曝書日記吳某又云乙巳歲吳門宗人枚菴借錄又爲勘出數處 簡莊徵君書云嘉慶十四年冬日陳鱣借錄于吳門寓舍并校一過時方得樊榭徵君所著玉臺書史因與拜經樓主人交易而觀

各鈔副本云次年春正月鱣識

又韓隨筆

右鈔本一冊題隨筆癸亥集前有叔紹貞序稱爲又韓姪而不著姓氏先子跋云癸亥集一冊近從茗賈得之據序稱又韓所撰又韓未詳其姓名似是禹航人曾任麻城令觀其書亦一超覽之士周芑兮大令讀之謂予曰明人著書大槩有二種一爲升菴派一爲詹公派癸亥集蓋詹公派也周之語雖如此然視世之但知以爛熟入比取巧名者不大有閒哉戊申長至後一日記

沈氏弋說

先子跋云己亥冬日收得舊鈔沈長卿弋說一冊蓋龍

山查堯卿上舍藏本也長卿字幼宰杭州人萬厯閒舉人按千頃堂書目沈氏弋說十卷月旦六卷今此編不列卷數又無序目疑非全書也

山陽錄

山陽錄一卷首有社衲米序 楊慧樓進士跋云定生先生爲復社領袖綰紵滿天下兵燹之後零落殆盡恨別感時驚心濺淚此錄之作何能已已也繚繞哀音聲聲入破山陽暮笛感頑艷而淒心脾人言愁我亦欲愁矣癸卯孟夏松陵楊復吉識 先君子書云予友吳江楊慧樓進士喜 國朝名家小品嘗錄得數百種名曰續 昭代叢書予家秋園雜佩皆從之借鈔者也

秋園雜佩

此卽從楊氏借鈔者有侯方域序予宗石跋語 慧樓
進士手書跋云是亦易安金石錄序遺山故物譜之類
也俛仰今昔盡然傷懷佩續紛以繚轉分遂菱絕離異
物猶如此人何以堪未免有情誰能遣此癸卯孟夏松
陵楊復吉識

善權古今文錄

右鈔本十卷寺僧方策纂有王濟之文衡山二序李瀛
蔣允岳跋 先君子書後已刻愚谷文存中

楊忠愍公手札

右錄忠愍與鄭端簡書題跋一卷 先君子跋已刊愚

谷文存此冊各有按語又書後云案忠愍公以嘉靖三十一年壬子秋陞南戶部主事未之任是冬卽調兵部武選司十二月十八日到任明年癸丑元旦日有食之公欲因此上書直陳時政故曰一路日食奏稿成也日食次日乃癸丑正月初二日攷明史世宗紀癸丑正月朔獨不言日食殆是日適逢陰晦彼君臣方欲諱災反以內璽臺爲妄故有拏打之事公見題目不合遂趨出別艸疏稿卽於是月十八日奏上此皆與年譜符合無可置疑其所謂南都事當卽興學校開荒田緝武備繕城池等皆公平日之欲爲而未得者年譜言之悉矣二王事亦不過言父子不宜疎遠之意蓋是時世宗尤多

嫌忌稍涉建儲事便曰欲死時君立新君立置重辟矣
公豈見不及此乎至末云湖翁欲老先生還朝湖翁當
卽徐少湖按端簡本傳以南太常召爲吏部侍郎歷階
刑部尙書皆如公所言也偶觀諸公所題多有異同者
聊復識之嘉慶戊午中元日某再跋千竹下書堂

顧令君政績卷

右題跋歌詠一冊皆爲令君禱雨陳山龍君行祠而作
張文漁徵士見此卷墨蹟錄出而先君子手書並有
按語跋文已見愚谷文存此冊末附許雲邨給諫顧令
君頌一篇頌爲先君子所收藏後以贈文漁徵君詳
見文存跋語中

許淮陽食史

食史一卷許稚則先生著前自序題崇禎辛未賣錫天
兩圯老饕書 先君子校並有按語

小名補錄

舊鈔本小名補錄後附名花異木記同邑陳香泉先生
著 先君子書後云此編所收多有與南宋陳思小字
錄及明沈宏正小字錄補相同者 先君子又輯香泉
論書偶記附後

敬修堂同學諸子出處記

右鈔本一册原有硃筆點次 先君照錄並校正

渡海輿記袖海編

鈔本渡海輿記不著撰人名氏有雍正十年知將樂縣
事蜀周于仁序袖海編汪鵬撰有乾隆甲申鵬自作序
二種合爲一冊 先君子手校並記後云乾隆辛丑十
月廿七日校於秦溪舟次時與室人同送外氏葬還經
烏夜邨小泊志

一隅錄

錢塘周澍著先生子手寫本蓋澍客臨汀時所記也自
序謂臨汀八閩一隅故以名編又云疇曩旅食金閭則
有姑蘇記事詩二卷都下則有帝京篇四卷涿鹿與李
中貴交則有溫樹錄一卷今皆未見予家所收者尙有
臺陽百咏鈔本 先君子曾采其茗壺詩入陽羨名陶

錄

竹垞初白二先生尺牘

竹垞初白二先生尺牘手跡並爲武原涉園主人所藏
蓋皆與寒中上舍者乾隆甲寅春先子假歸彙錄一冊
題竹垞尺牘後云予以甲寅暮春之初與諸名士修
禊于海鹽城南張氏之涉園主人雅好事又與予有連
是日余以所藏楊忠愍公獄中寄鄭端簡手書真蹟歸
端簡後人羹和茂才卽席同人皆賦詩紀事留連竟日
頗極文酒之樂鷗舫旋出此冊見眎蓋皆竹垞檢討晚
年手筆也因借歸細閱之書凡六十通其間與馬寒中
上舍者什九寒中爲吾邑藏書家拙架多人閒未見本

故書中大抵皆論典籍事或展轉傳鈔或多方購買於此想見前輩好學之勤嗜書之篤誠可慕也至其中論耿炳文沒于洪武二十七年而紀傳謂建文命炳文率師禦燕由實錄爲西楊改削文獻無徵此書足正史傳之失又豈尋常簡札酬應之比哉因亟錄副而以原本還鷗舫俾珍弄之鷗舫爲大白先生來孫累世清秘之藏彷彿插花山斯蓋其一斑云是歲競渡日兔牀吳某識 又書初白菴尺牘後云右初白先生尺牘蓋皆與寒中上舍者其真迹並涉園主人所藏也某又記 惜鈔本尙有譌字須再校正爲善倘得好古者梓而行之俾前輩嘉言懿行時時在人耳目所裨豈淺鮮哉

元珠密語

元珠密語唐王珣著影宋寫本每葉十六行行十六字前有自序後瀉城成孚氏跋云元密一書除宋版外更無二刻又其書微渺難測世醫亦不欲深究其理是以所傳不甚廣迄今日已成絕無而僅有矣余購之廿年卽鈔本未獲一遇歲乙亥偶於茸城張氏得見宋刻本一時驚喜如覩至寶詢之云以重價購得余懇借再四始獲攜歸卽命諸子弟力疾鈔之近聞張氏本已充進御物矣余獲借鈔不勝幸甚爰識其始末如此後人其世守之勿替瀉城成孚氏識下有潤挺之印莘畊二圖記先君子書云元珠密語十六卷不見于新舊唐

書藝文志及文獻通考惟晁氏讀書志有天元玉冊三十卷云啓元子撰啓元子卽唐王珣也書推五運六氣之變今此只十六卷未知與天元玉冊相同否夾漈通志元珠密語十卷不著撰人焦氏經籍志同讀書敏求記元珠密語十七卷七或六之譌盱江張三錫運氣格以爲託名元珠密語予按其序云余于百年間不逢志求之士遂書五本藏之五嶽深洞中遇者可以珍重之寶愛之勿妄傳之見之天生可以延年見之天殺可以逃殺傳之非人殃墮九祖其言多詭誕不經盱江之言當非謬也嘉慶甲子四月兔牀志 簡莊徵君得吳中袁氏鈔本復爲互勘一過書云唐啓元子元珠密語按

啓元子卽王珣也珣註內經序云辭理秘密難粗論述者別譔元珠以陳其道宋高保衡等新校正云詳王氏元珠世無傳者今有元珠十卷昭明隱旨三卷蓋後人附託之文雖非王氏之書亦於素問第十九卷至二十二卷頗有發明其隱旨三卷與今所謂天元玉冊者正相表裏而與王珣之義多不同是唐時實有元珠一書而宋時所傳者疑爲附託但自宋以來流傳甚少耳余得吳中袁氏鈔本十七卷與讀書敏求記合此本爲吳氏拜經樓舊藏後有成孚氏跋知從宋版傳鈔惟止十六卷今以余所得本校之則十一十二兩卷并而爲一又五行類應紀篇脫落數番彼此互勘庶得完善矣

嘉慶十五年除夕渤海陳鱣記

賜按此書自序云今則直言編紀一十六卷目

錄亦十六卷恐分併有所遺耳

宣明論方

宣明論方七卷每葉二十八行行二十五字有大定十二年守真自序大定乙亥古唐馬□□序紙墨古雅當是明以前刻本首列分門科類總一十八門次列諸藥炮熅炙燂例先君子書河間三書前云河間宣明論方原刻七卷後人翻刻妄分爲十五卷而行款亦多改換余家舊本有大定己亥古唐馬□□序賜按四庫目錄亦十五卷云大旨本素問及金匱要略而用藥多主寒涼蓋因北方地氣而施泥之者非廢之者亦非也

自序稱三卷此本乃十五卷其方下小序有稱灌頂王子所傳者金時安有是名知傳刻有所竄入也其作十五卷蓋亦據近時刻本且按守真自序云僕今詳內經編集運氣要妙之說七萬餘言九篇分爲三卷謹成一部目之曰內經運氣要旨論備聖經之用也對病論證處方之法本草性味猶恐後學難爲驅用復宗長沙太守仲景之書迺爲一帙計十萬餘言目曰素問藥證精要宣明論方云云是三卷者乃內經運氣要旨論非此書也此本前題校正素問精要宣明論方蓋亦經後人點勘矣

本草衍義

本草衍義二十卷每葉二十四行行二十一字首行題
本草衍義卷之一次題通直郎添差充收買藥材所辨
驗藥材寇宗奭編輯首張缺前半頁後半頁第一行聖
旨寇宗奭特與轉壹官依條施行添差充收買藥材所
辨驗藥材二行右割付寇宗奭三行政和六年十二月
二十八日五行宣和元年月本宅鏤版印造六行姪宣
教郎知解州解縣巫寇約校勘紙墨古雅有汪文柏柯
庭休甯汪季青家藏書籍圖記面頁題搗藻堂藏

經歷奇證

經歷奇證不分卷明錢唐錢君穎著 先君子從道古
堂借錄識後云錢君穎在勝國時以醫鳴是編病原治

法多常人耳目所未及者惜流傳不廣昔年見舊刊於
堇浦先生案頭因從之借鈔以備活人之一種云乾隆
丁酉九秋兔牀記

心印紺珠經

右二卷明刻本前有江州陳守義序嘉靖己酉歸德府
儒學教授浙東葉良玉書後 先君子書云按千頃堂
書目心印紺珠經二卷元朱搆作字好謙傳醫學子李
湯卿劉河閒弟子

治法彙

右七卷舊人批本 先君子題云岐黃之書惟肝江之
說最醇正無弊相傳評點者爲石門某氏昔二愚兄有

之後遊廣陵歸失去常以爲憾嘉慶癸亥夏五月予復購得此本雖非石門親筆亦有心濟世者之所當留意歟竹醉後二日三歸亭長識又云二愚兄有舊時徐養餘齋過錄治法彙一部因假而校對則二愚本評點多漏略不全大約僅什之二三而已其間有此本所無者以墨筆補之其下有稱琦記者二愚謂卽誠庵公未審是否當更攷之某又識

已任編

右八卷內墨筆朱筆藍筆三種評點卷首眉間書云乙亥十月偶評與丁卯庚午批點微別四卷以後係幼時筆記有東臯州堂圖記

痘疹仁端錄

右鈔本六卷明楊李徐謙仲光著先君補鈔首序二編並記首簡云按簡明書目仁端錄十六卷十字疑衍明徐謙著其門人陳葵刪定今此本六卷視近時坊刻五卷者不翅倍蓰究不知陳葵定本何如恐未必如此本之詳也兔床記

葬書

右葬書草廬先生所定分內外雜三篇首有目錄目後序云右葬書相傳以爲晉郭璞景純之作內外八篇凡一千二百四十二字世俗所行有二十篇皆後人增以謬妄之說建安蔡季通去其十二而存其八亦旣得之

就其所存猶不無顛倒混淆之失此本爲最善篇分內外蓋有微意雜篇二俗本散在正書篇中或術家秘齋故亂之也此別爲篇論類精矣覽者詳焉臨川山人谷澂識前題地理葬書集註草廬先生吳文正澂刪定後學金華元默生鄭謐注釋後附葬書問對不著名氏有趙子常跋云吾友程君仲本最爲留意斯事故書以遺之仲本之師朱君允升其人也云云末題至正十三年十月旣望趙汭子常書于東山精舍是本紙墨精雅古香可愛先君子嘗以示黃堯圃主事並別錄宋濂序一紙于後書云吾舊藏元版葬書黃堯圃云的屬元刻渠家亦有一部與此本同讀書敏求記所載卽此本此

宋潛溪序乃明初刻有元本未有也則未有宋序者不更可寶歟

靈棋經

靈棋經一冊不分卷無撰人名氏有唐會昌九年尙書司門員外李遠敍書中題晉駕部郎中顏幼明註宋御史中丞何承天註元廬山叔才陳師凱解大明誠意伯劉伯溫解每卦象下皆繫以顏曰何曰陳曰劉曰等解先君子手書通志一條靈棋經一卷張良傅撰又一卷唐李暹撰齊江謚占得送貨卦見南史卅六御覽七百廿六又書南牕記談一則于別紙云傅崧卿以冰餽同舍其柬詞云蓬萊道山羣仙所遊清異人境不風自

涼火雲騰空莫之能口餉以冰雪是謂附益讀者莫解
或曰此靈棋也又董舍三岡識略云靈棋經不知造於
何人前列唐人一序云漢留侯受之黃石公用梓木製
棋十二刻上中下各四擲成卦每歲人日以酒果祭之
考書披詞吉凶得失莫不奇應予虔奉二十餘年叩以
事十驗八九勝于市廛卜肆多矣前列造靈棋法占儀
祭儀祝文乾隆壬子十二月十一日 先君子曾以卜
萬蒼山墓地得大通卦

景祐遁甲符應經

遁甲符應經讀書敏求記作三卷此寥寥數十番不分
卷未知是全書否有永樂十三年御製後序末爲遁甲

大全集有出行圖十二神圖鈔本有祝眉老印

圖繪寶鑑

右五卷元刻本每葉二十二行行二十字先君子跋
刻愚谷文存吳中黃堯圃主事跋云夏文彥圖繪寶
鑑五卷載於讀書敏求記者爲得其真他如津逮所刻
已合明欽天監玉泉韓昂續纂者而并爲六卷又何論
近刻之八卷者乎余所收論畫諸書如畫評圖畫見聞
志宣和畫譜廣川畫跋畫繼畫鑒等皆有舊刻名鈔惟
此獨無善本今觀此刻歎爲希有蓋書必求其初刻如
此刻雖漫漶不可卒讀然五卷原書具在後附補遺與
他本附補遺於六卷後者面目已改豈不可寶且收藏

爲廬江王猶是幾百年前故物拜經樓主人以爲裝潢
極精非民間藏書吾嘗見成化時閣本大唐開元占經
每冊俱用黃綾作簿面復用黃絹作籤條此可見官書
鄭重卽裝潢可辨與此可互證也士良搜羅盡人姓氏
可謂極詳然吾有疑焉嘉熙時有宋伯仁梅花喜神譜
二卷潛溪先生詳畫梅之原五代有滕勝華宋有趙士
雷耶慶餘徐熙仲仁師楊補之今寶鑑所列一一不爽
獨遺伯仁一人則士良之書殆有未盡耶聊記於此以
備考壬戌仲秋二十有七日海甯陳簡莊攜此本示余
云是吳君兔牀所儲屬余題識越五日爲九月二日聽
雨士禮居中繙閱一過古香襲人殊破岑寂爰跋數語

而歸之吳縣蕘圃黃丕烈識 簡莊徵君跋云圖繪寶鑑五卷元吳興夏文彥撰是本雖墨色漫壞然猶是元版而明印者遠勝今本之竄亂混淆矣卷首抱遺老人敘艸書極佳蓋係鐵厓手書付梓敘稱雲閒義門夏氏則文彥又爲雲閒人是書每冊有廬江王圖記王藏書甚富就余所見凡數種皆善本云陳鱣記

畫徵錄

增訂畫徵錄三卷後附圖畫精意誠 先君子親筆評點並補畫家數人

宋本百川學海

舊刻本五十八種內重中華古今注試筆二種有休寧

汪季青家藏書籍圖記 先君子書目錄於別紙並記
云此書各種說部疑是百川學海記五十八種內重二種也
是圖書目百川學海一百三十四卷又以墨筆標識四
十六種云上有點者蘭竹山房本所有與予所藏同一
板口又書開天傳信記目下云萬回事惟此獨詳 其
中翰林志一卷 先君子手校並書六典中書一條上
云行者下少則用之三字宋本亦少此三字鮑以文校
翰苑羣書云然然則此宋本也

拜經樓藏書題跋記卷四終